

2013 թվականի առաջին կիսամյակում ՀՀ պետական բյուջեի կատարման ամփոփ բնութագիրը¹

2013 թվականի առաջին կիսամյակում ՀՀ պետական բյուջեի եկամուտները կազմել են 505.3 մլրդ դրամ, իսկ ծախսերը՝ 458.1 մլրդ դրամ, որոնք համապատասխանաբար 100.6%-ով և 90.8%-ով ապահովել են ՀՀ կառավարության առաջին կիսամյակի ծրագրի կատարումը: Հարկ է նշել, որ ապահովվել է պետական բյուջեի ծախսային ծրագրերի շրջանակներում առաջին կիսամյակում պետական մարմինների կողմից սահմանված կարգով ստանձնած պարտավորությունների ամբողջական կատարումը: «Հայաստանի Հանրապետության 2013 թվականի պետական բյուջեի մասին» ՀՀ օրենքի 9-րդ հոդվածի 11-րդ կետի և 11-րդ հոդվածի 3-րդ կետի պահանջներից ելնելով՝ պետության դրամական միջոցների համախմբված հաշվառման նպատակով պետական բյուջեի ծրագրային և փաստացի ցուցանիշներում ներառվել են նաև ՀՀ պետական հիմնարկների համար բացված արտաբյուջետային հաշիվների համապատասխան շրջանառությունը, ինչպես նաև առանց սահմանափակման պետական բյուջեից կատարվող վճարումները: Մասնավորապես՝ արտաբյուջետային եկամուտները կազմել են 12.3 մլրդ դրամ կամ առաջին կիսամյակում նախատեսված մուտքերի 74.4%-ը, իսկ ծախսերը՝ 9.7 մլրդ դրամ կամ կիսամյակային ծրագրի 52.3%-ը: Պետական բյուջեի տարեկան ծրագրային ցուցանիշները կատարվել են եկամուտների գծով՝ 46.9%-ով, ծախսերի գծով՝ 43%-ով:

ՀՀ պետական բյուջեի եկամուտները

2012 թվականի առաջին կիսամյակի համեմատ պետական բյուջեի եկամուտներն աճել են 20.4%-ով կամ շուրջ 85.5 մլրդ դրամով, ինչը հիմնականում ապահովվել է հարկային եկամուտների աճի հաշվին:

Պետական բյուջեի եկամուտների 94.9%-ը ձևավորվել է հարկային եկամուտների և պետական տուրքերի, 4.8%-ը՝ այլ եկամուտների, 0.3%-ը՝ պաշտոնական դրամաշնորհների հաշվին:

¹ Պետական բյուջեի եկամուտներում, ծախսերում և պակասուրդի ֆինանսավորման աղբյուրներում ներառված չեն արտաքին աղբյուրներից ֆինանսավորվող նպատակային ծրագրեր իրականացնող գրասենյակներով շրջանառվող միջոցները:

2013 թվականի առաջին կիսամյակում ՀՀ պետական բյուջե են մուտքագրվել շուրջ 479.6 մլրդ դրամ հարկային եկամուտներ և պետական տուրքեր, որոնք կազմել են կիսամյակային ծրագրի 101.9%-ը: 2012 թվականի նույն ժամանակահատվածի համեմատ նշված եկամուտներն աճել են 21.1%-ով կամ 83.6 մլրդ դրամով, ինչը մեծ մասամբ պայմանավորված է ավելացված արժեքի հարկի, մաքսատուրքի և բնապահպանական ու բնօգտագործման վճարների աճով: Բացի այդ, 2013 թվականից հարկային օրենսդրության մեջ կատարված փոփոխությամբ նախկինում սահմանված եկամտահարկի և պարտադիր սոցիալական ապահովության վճարների փոխարեն ներդրվել է մեկ միասնական՝ եկամտային հարկ, որի գծով անցած ժամանակահատվածում պետական բյուջե է մուտքագրվել ավելի քան 108.3 մլրդ դրամ: 2013 թվականի առաջին կիսամյակում նախորդ տարվա պարտավորությունների գծով ՀՀ պետական բյուջե են մուտքագրվել շուրջ 13.9 մլրդ դրամ պարտադիր սոցիալական ապահովության վճարներ և շուրջ 6.5 մլրդ դրամ եկամտահարկ: Եկամտային հարկից ստացված մուտքերը՝ հաշվետու ժամանակահատվածում մուտքագրված եկամտահարկի և պարտադիր սոցիալական ապահովության վճարների հետ միասին (որոնք մուտքագրվել են նախորդ տարվա պարտավորությունների գծով) 24.4%-ով (շուրջ 25.3 մլրդ դրամով) գերազանցել են նախորդ տարվա նույն ժամանակահատվածում մուտքագրված եկամտահարկի և պարտադիր սոցիալական ապահովության վճարների մուտքերը: 2013 թվականից ներդրվել է ևս մեկ նոր հարկատեսակ՝ շրջանառության հարկը, որի գծով առաջին կիսամյակում ՀՀ պետական բյուջե է մուտքագրվել ավելի քան 5.1 մլրդ դրամ:

2013 թվականի առաջին կիսամյակում ՀՀ պետական բյուջեի հարկային եկամուտների և պետական տուրքերի 40.1%-ն ապահովվել է ավելացված արժեքի հարկի հաշվին: Այն կազմել է շուրջ 192.4 մլրդ դրամ և 22.7%-ով կամ 35.6 մլրդ դրամով գերազանցել նախորդ տարվա նույն ցուցանիշը, ինչը հիմնականում ապահովվել է ներմուծումից ստացված եկամուտների հաշվին:

Պետական բյուջեի հարկային եկամուտների ու պետական տուրքերի 4.5%-ն ապահովվել է ակցիզային հարկի հաշվին՝ կազմելով շուրջ 21.7 մլրդ դրամ: Մասնավորապես՝ հանրապետություն ներմուծվող ենթասակցիզային ապրանքների հարկումից ստացվել է 15.4 մլրդ դրամ, հանրապետությունում արտադրվող ենթասակցիզային ապրանքների հարկումից՝ 6.2 մլրդ դրամ: Տեղական արտադրության ենթասակցիզային

ապրանքների հարկումից ստացված մուտքերը նախորդ տարվա նույն ժամանակահատվածի համեմատ նվազել են 16.4%-ով, իսկ ներմուծվող ապրանքների գծով մուտքերը՝ ավելացել 16%-ով. արդյունքում ակցիզային հարկի ընդհանուր մուտքերն աճել են 4.4%-ով կամ շուրջ 913.9 մլն դրամով:

2013 թվականի առաջին կիսամյակում ՀՀ պետական բյուջեի հարկային եկամուտների և պետական տուրքերի 13.7%-ը ձևավորվել է շահութահարկի հաշվին՝ կազմելով 65.9 մլրդ դրամ: Նախորդ տարվա նույն ժամանակահատվածի համեմատ շահութահարկի մուտքերն աճել են 5.6%-ով կամ շուրջ 3.5 մլրդ դրամով:

Մաքսատուրքի գծով մուտքերը կազմել են 24.2 մլրդ դրամ կամ հարկերի և տուրքերի 5%-ը և 39.0%-ով կամ 6.8 մլրդ դրամով գերազանցել 2012 թվականի համապատասխան ցուցանիշը:

2013 թվականի առաջին կիսամյակում պետական բյուջե են մուտքագրվել շուրջ 11.9 մլրդ դրամ պետական տուրքեր՝ կազմելով առաջին կիսամյակի ծրագրի 100.5%-ը և ապահովելով ՀՀ պետական բյուջեի հարկերի ու տուրքերի 2.5%-ը: Նախորդ տարվա նույն ժամանակահատվածի համեմատ նշված մուտքերն աճել են 10.3%-ով կամ 1.1 մլրդ դրամով:

Հաշվետու ժամանակահատվածում գործունեության առանձին տեսակներից գանձվել են շուրջ 5.8 մլրդ դրամ հաստատագրված վճարներ՝ ապահովելով հարկային եկամուտների ու պետական տուրքերի 1.2%-ը: Նշված ցուցանիշը նախորդ տարվա առաջին կիսամյակի համեմատ նվազել է 30.5%-ով՝ հիմնականում պայմանավորված «Հաստատագրված վճարների մասին» ՀՀ օրենքում կատարված փոփոխություններով, որոնց համաձայն գործունեության մի քանի տեսակներ դուրս բերվեցին հաստատագրված վճարով հարկվող գործունեության տեսակների ցանկից:

2013 թվականի առաջին կիսամյակում ՀՀ պետական բյուջե են մուտքագրվել շուրջ 17.5 մլրդ դրամ բնօգտագործման և բնապահպանական վճարներ՝ կազմելով հարկերի և տուրքերի 3.6%-ը: Նախորդ տարվա նույն ժամանակահատվածի համեմատ նշված եկամուտներն աճել են 59.4%-ով՝ հիմնականում պայմանավորված արդյունահանված մետաղական օգտակար հանածոների և դրանց վերամշակման արդյունքում ստացված արտադրանքի իրացման համար վճարվող ոռյալթիի և այլ պետություններում գրանցված տրանսպորտային միջոցներից օդային ավազան վնասակար նյութեր արտանետելու համար գանձվող վճարների աճով:

2013 թվականի առաջին կիսամյակում ՀՀ պետական բյուջե են մուտքագրվել 6.5 մլրդ դրամի այլ հարկեր՝ կազմելով հարկերի և տուրքերի 1.4%-ը: Մասնավորապես՝ 3.5 մլրդ դրամ են կազմել արտոնագրային վճարները, որոնք նախորդ տարվա նույն ժամանակահատվածի համեմատ աճել են 19.5%-ով կամ 563 մլն դրամով: Ավելի քան 1.7 մլրդ դրամ է մուտքագրվել ճանապարհային վճարների գծով, որոնք նախորդ տարվա նույն ժամանակահատվածի համեմատ աճել են 76.2%-ով կամ 748.8 մլն դրամով: 43.1 մլն դրամ են կազմել ռադիոհաճախականության օգտագործման թույլտվության տրամադրման (գործողության ժամկետի երկարաձգման) վճարները, 300.3 մլն դրամ՝ հարկային օրենսդրության խախտման համար «Հարկերի մասին» ՀՀ օրենքով սահմանված տուգանքները, 262.3 մլն դրամ՝ հանրային ծառայությունների կարգավորման պարտադիր վճարները, 163.7 մլն դրամ՝ «Առևտրի և ծառայությունների մասին» ՀՀ օրենքով սահմանված դրոշմապիտակների ձեռք բերման վճարները, 4.7 մլն դրամ՝ կոնցեսիոն վճարը, և շուրջ 684.8 մլն դրամ՝ ՀՀ կառավարությանն առընթեր պետական եկամուտների կոմիտեի նյութական խրախուսման ֆոնդի եկամուտները: Նախորդ տարվա առաջին կիսամյակի համեմատ այլ հարկերի փաստացի ցուցանիշն աճել է 24.3%-ով կամ շուրջ 1.3 մլրդ դրամով, ինչը հիմնականում պայմանավորված է ճանապարհային և արտոնագրային վճարների աճով:

2013 թվականի առաջին կիսամյակում ՀՀ պետական բյուջե են մուտքագրվել ավելի քան 1.3 մլրդ դրամ դրամաշնորհներ՝ կազմելով կիսամյակային ծրագրով նախատեսված դրամաշնորհների ընդհանուր գումարի 17.1%-ը: Նշված գումարը ստացվել է ՀՀ պետական մարմինների արտաբյուջետային ծրագրերի շրջանակներում և կազմել կիսամյակային ծրագրի 67.7%-ը: Առաջին կիսամյակում համապատասխանաբար 3.1 մլրդ դրամ և 2.6 մլրդ դրամ դրամաշնորհներ են նախատեսվել Եվրոպական հարևանության շրջանակներում 2010թ. Ազգային գործողությունների ծրագրի և ՀՀ-ԵՄ գործողությունների ծրագրով նախատեսված միջոցառումների ֆինանսավորման համար, որոնք հունվար-հունիս ժամանակահատվածում չեն ստացվել:

2013 թվականի առաջին կիսամյակում ՀՀ պետական բյուջեի այլ եկամուտները կազմել են 24.4 մլրդ դրամ՝ 3.4%-ով գերազանցելով կիսամյակային ծրագրային ցուցանիշը: Նշված գումարից շուրջ 10.3 մլրդ դրամը կազմել են ՀՀ պետական հիմնարկների արտաբյուջետային եկամուտները, որոնց կիսամյակային ծրագիրը կատարվել է 76.9%-ով:

Առանց արտաբյուջետային միջոցների՝ այլ եկամուտների գծով առաջին կիսամյակի ծրագիրը կատարվել է 138.1%-ով: Նախորդ տարվա նույն ժամանակահատվածի համեմատ պետական բյուջեի այլ եկամուտներն աճել են 10.1%-ով կամ 2.2 մլրդ դրամով:

ՀՀ կառավարությանն առընթեր անշարժ գույքի կադաստրի պետական կոմիտեի ծախսերի նկատմամբ եկամուտների գերազանցումից ՀՀ պետական բյուջե է մուտքագրվել 59.3 մլն դրամ, որը 2013 թվականի պետական բյուջեով չէր նախատեսվել:

Պետական սեփականություն հանդիսացող գույքի վարձակալությունից ստացվել է 389.4 մլն դրամ՝ կազմելով կիսամյակային ծրագրի 112%-ը:

Բանկերում և այլ ֆինանսավարկային հաստատություններում բյուջեի ժամանակավոր ազատ միջոցների տեղաբաշխումից և դեպոզիտներից ստացվել են 2.9 մլրդ դրամ տոկոսավճարներ՝ 6.5 անգամ գերազանցելով կիսամյակային ծրագրային ցուցանիշը և 16.7%-ով գերազանցելով նախորդ տարվա մուտքերը:

Իրավաբանական անձանց կապիտալում կատարված ներդրումների դիմաց ստացվել են շուրջ 46.3 մլն դրամ շահաբաժիններ՝ կազմելով կիսամյակային ծրագրի 31.2%-ը և 8.5%-ով զիջելով նախորդ տարվա մուտքերը: Ծրագրի ցածր կատարողականը պայմանավորված է արտաբյուջետային մուտքերով, առանց որոնց շահաբաժինների առաջին կիսամյակի ծրագիրը կատարվել է 92.5%-ով:

Պետության կողմից տրված վարկերի օգտագործման դիմաց հաշվետու ժամանակահատվածում պետական բյուջե են մուտքագրվել 2.7 մլրդ դրամ տոկոսավճարներ՝ 83.3%-ով ապահովելով կիսամյակային ծրագրային ցուցանիշը և 19%-ով զիջելով 2012 թվականի նույն ժամանակահատվածի փաստացի ցուցանիշը: Շեղումը հիմնականում պայմանավորված է ռեզիդենտներին տրամադրված վարկերի գծով որոշ վճարումներ հուլիսին իրականացնելու հանգամանքով՝ վճարումների օրերը ոչ աշխատանքային օրերի հետ համընկնելու պատճառով:

Հաշվետու ժամանակահատվածում ավելի քան 4.1 մլրդ դրամ է մուտքագրվել իրավախախտումների համար կիրառվող պատժամիջոցներից՝ կազմելով կիսամյակային ծրագրով կանխատեսված ցուցանիշի 86.5%-ը և 31.7%-ով կամ 993.7 մլն դրամով գերազանցելով նախորդ տարվա նույն ժամանակահատվածի ցուցանիշը:

Ապրանքների մատակարարումից և ծառայությունների մատուցումից ստացված եկամուտները կազմել են շուրջ 12.3 մլրդ դրամ կամ կիսամյակային ծրագրի 86.1%-ը:

Հաշվետու ժամանակահատվածում ստացվել են 2.1 մլն դրամ ոչ պաշտոնական դրամաշնորհներ՝ կազմելով կիսամյակային ծրագրի 27.5%-ը:

Օրենքով և այլ իրավական ակտերով սահմանված՝ պետական բյուջե մուտքագրվող այլ եկամուտները կազմել են ավելի քան 1.8 մլրդ դրամ՝ 5.6 անգամ գերազանցելով կիսամյակային ծրագրով կանխատեսված ցուցանիշը:

ՀՀ պետական բյուջեի ծախսերը

2013 թվականի առաջին կիսամյակի ՀՀ պետական բյուջեի ծախսերը նախորդ տարվա նույն ժամանակահատվածի համեմատ աճել են 8%-ով կամ 33.9 մլրդ դրամով, ինչը հիմնականում պայմանավորված է ընթացիկ ծախսերի աճով:

Ընթացիկ ծախսերը հաշվետու ժամանակահատվածում կազմել են 431 մլրդ դրամ՝ 94.3%-ով ապահովելով կիսամյակային ծրագրի կատարումը: Նախորդ տարվա առաջին կիսամյակի համեմատ ընթացիկ ծախսերն աճել են 7.9%-ով կամ 31.7 մլրդ դրամով:

Ընթացիկ ծախսերից 43.8 մլրդ դրամ տրամադրվել է պետական հիմնարկների աշխատողների աշխատանքի վարձատրությանը, որը կազմել է կիսամյակային ծրագրի 93.5%-ը և 18.5%-ով (6.8 մլրդ դրամով) գերազանցել նախորդ տարվա նույն ցուցանիշը: Վերջինս հիմնականում պայմանավորված է այն հանգամանքով, որ «Եկամտային հարկի մասին» ՀՀ օրենքով զինծառայողների դրամական եկամուտները հանվել են նախկինում նվազեցվող եկամուտներ համարվող եկամուտների ցանկից, և սահմանվել է, որ զինծառայողներին վճարվող դրամական եկամուտները հարկվում են եկամտային հարկով՝ օրենքով սահմանված ընդհանուր կարգով:

Ծառայությունների և ապրանքների ձեռքբերման նպատակով 2013 թվականի առաջին կիսամյակում պետական բյուջեից օգտագործվել է 93.7 մլրդ դրամ, որը կազմել է կիսամյակային ծրագրի 90.4%-ը և 4.9%-ով (4.4 մլրդ դրամով) գերազանցել նախորդ տարվա համապատասխան ցուցանիշը՝ հիմնականում պայմանավորված նյութերի ձեռք բերման ծախսերի աճով:

Պետական պարտքի սպասարկմանը հաշվետու ժամանակահատվածում տրամադրվել է շուրջ 22.4 մլրդ դրամ՝ կազմելով կիսամյակային ծրագրի 95.6%-ը: Մասնավորապես՝ նշված գումարից ավելի քան 13.8 մլրդ դրամ տրամադրվել է ներքին, 8.5 մլրդ դրամ՝ արտաքին

պարտքի սպասարկմանը: Պետական պարտքի սպասարկման ծախսերը 13%-ով կամ 2.6 մլրդ դրամով գերազանցել են նախորդ տարվա նույն ցուցանիշը:

Հաշվետու ժամանակահատվածում ՀՀ պետական բյուջեից տրամադրվել են շուրջ 13.1 մլրդ դրամի սուբսիդիաներ՝ կազմելով կիսամյակային ծրագրի 93.8%-ը և 30.6%-ով (3.1 մլրդ դրամով) գերազանցելով նախորդ տարվա համապատասխան ցուցանիշը:

2013 թվականի առաջին կիսամյակի ընթացքում ՀՀ պետական բյուջեից տրամադրվել են 49.4 մլրդ դրամ դրամաշնորհներ, որից 48.7 մլրդ դրամը՝ պետական հատվածի այլ մակարդակներին, 755.5 մլն դրամը՝ միջազգային կազմակերպություններին: Մասնավորապես՝ համայնքների բյուջեներին տրամադրվել են 18.1 մլրդ դրամ դոտացիաներ, որոնք նախորդ տարվա համեմատ աճել են 11.6%-ով: Դրամաշնորհների կիսամյակային ծրագիրն ընդհանուր առմամբ կատարվել է 95.8%-ով, իսկ նախորդ տարվա նույն ժամանակահատվածի համեմատ նշված ծախսերն աճել են 4.3%-ով կամ 2 մլրդ դրամով՝ հիմնականում պայմանավորված համայնքների բյուջեներին համահարթեցման սկզբունքով տրվող դոտացիաների աճով:

Ընթացիկ ծախսերի 34%-ը՝ 146.6 մլրդ դրամ, ուղղվել է սոցիալական նպաստների և կենսաթոշակների վճարմանը՝ ապահովելով ներկայացված բոլոր պարտավորությունների կատարումը և արձանագրելով կիսամյակային ծրագրի 96.6% կատարողական: Մասնավորապես՝ 98.5 մլրդ դրամ են կազմել կենսաթոշակները, ավելի քան 48 մլրդ դրամ՝ նպաստները: Նախորդ տարվա առաջին կիսամյակի համեմատ նպաստների և կենսաթոշակների ծախսերն ավելացել են 4.3%-ով կամ 6 մլրդ դրամով:

Հաշվետու ժամանակահատվածում պետական բյուջեի միջոցներից 62.1 մլրդ դրամ տրամադրվել է այլ ծախսերին՝ կազմելով կիսամյակային ծրագրի 94.2%-ը և 12.2%-ով կամ 6.8 մլրդ դրամով գերազանցելով նախորդ տարվա նույն ցուցանիշը:

Պետական բյուջեի ոչ ֆինանսական ակտիվների հետ գործառնությունները 2013 թվականի առաջին կիսամյակի ընթացքում կազմել են 27.1 մլրդ դրամ կամ կիսամյակային ծրագրի 57.2%-ը: Մասնավորապես՝ 27.8 մլրդ դրամ են կազմել ոչ ֆինանսական ակտիվների գծով ծախսերը, որոնց կիսամյակային ծրագիրը կատարվել է 58.1%-ով: Նախորդ տարվա նույն ժամանակահատվածի համեմատ ոչ ֆինանսական ակտիվների գծով ծախսերն աճել են 9.7%-ով կամ 2.4 մլրդ դրամով: Ոչ ֆինանսական ակտիվների օտարումից մուտքագրվել է 680.2 մլն դրամ՝ 73.1%-ով գերազանցելով առաջին կիսամյակի ծրագրով

կանխատեսված ցուցանիշը և 49.9%-ով՝ նախորդ տարվա փաստացի ցուցանիշը: Նախորդ տարվա նույն ժամանակահատվածի համեմատ ոչ ֆինանսական ակտիվների հետ գործառնությունների ցուցանիշն արձանագրել է 8.9% (2.2 մլրդ դրամով) աճ՝ հիմնականում պայմանավորված շենքերի և շինությունների ծախսերի աճով:

ՀՀ պետական բյուջեի հավելուրդը

2013 թվականի առաջին կիսամյակում ՀՀ պետական բյուջեն կատարվել է 47.2 մլրդ դրամ հավելուրդով (առանց արտաքին աջակցությամբ իրականացվող նպատակային ծրագրերը հաշվի առնելու)՝ նախատեսված 2.2 մլրդ դրամ պակասուրդի դիմաց: Մասնավորապես՝ ներքին ֆինանսավորումը կազմել է շուրջ 7.0 մլրդ դրամ, արտաքին ֆինանսավորումը՝ -54.2 մլրդ դրամ: Հաշվետու ժամանակահատվածում բյուջետային ելքերի համեմատ մուտքերի առավել բարձր կատարողականի արդյունքում հավելուրդի ներքին աղբյուրներում ձևավորված ազատ միջոցներն ավելացել են 3.4 մլրդ դրամով՝ առաջին կիսամյակի ծրագրով նախատեսված 45.3 մլրդ դրամի օգտագործման փոխարեն:

Ներքին աղբյուրներում 3.7 մլրդ դրամ են կազմել փոխառու զուտ միջոցները, 3.3 մլրդ դրամ՝ ֆինանսական զուտ ակտիվները: Ներքին փոխառու միջոցներում 4.7 մլրդ դրամ են կազմել գանձապետական պարտատոմսերից զուտ մուտքերը: 211.6 մլն դրամ ուղղվել է պետական բյուջեից տրամադրված մուրհակների մարմանը: Նախատեսված ծավալով՝ 811 մլն դրամի չափով, կատարվել է «ՎՏԲ-Հայաստան» ՓԲԸ-ից ստացված վարկի մարումը: Հաշվետու ժամանակահատվածում ՀՀ ռեզիդենտներին պետական բյուջեից տրամադրվել են շուրջ 4.7 մլրդ դրամի վարկեր՝ կազմելով կիսամյակային ծրագրի 54.8%-ը: Նշված գումարից 1.2 մլրդ դրամը տրամադրվել է Ռուսաստանի Դաշնության կողմից Հայաստանի Հանրապետությանը 2009 թվականին տրամադրված պետական վարկի միջոցներից, որից 903 մլն դրամը՝ «Հայաստանի փոքր և միջին ձեռնարկատիրության զարգացման ազգային կենտրոն» հիմնադրամի կողմից հիմնադրված վարկային կազմակերպությանը և 305.4 մլն դրամ՝ «Ռադիոիզոտոպների արտադրության կենտրոն» ՓԲԸ-ին: Շուրջ 11.3 մլրդ դրամ ստացվել է տրամադրված ներքին վարկերի վերադարձից:

Անցած ժամանակահատվածում պետական բյուջեի պակասուրդի արտաքին ֆինանսավորումը կազմել է -54.2 մլրդ դրամ: Արտաքին աղբյուրներում -32.7 մլրդ դրամ են կազմել փոխառու զուտ միջոցները՝ 99.5%-ով կատարելով կիսամյակային ծրագիրը:

Մասնավորապես՝ 32.8 մլրդ դրամ ուղղվել է արտաքին պարտավորությունների մարմանը, որից շուրջ 3.7 մլրդ դրամը հատկացվել է Համաշխարհային բանկի աջակցությամբ իրականացվող ծրագրերի գծով պարտքի մարմանը, 17.9 մլրդ դրամը՝ Արժույթի միջազգային հիմնադրամի, 284.7 մլն դրամ՝ ԳԶՄՀ, 202.8 մլն դրամ՝ ՕՊԵԿ-ի միջազգային զարգացման հիմնադրամի, 269.7 մլն դրամ՝ ՎՋԵԲ նկատմամբ ունեցած պարտքի մարմանը: 466.7 մլն դրամ է տրամադրվել ԱՄՆ ապրանքային վարկերի մարմանը, 650.9 մլն դրամ՝ Ճապոնիայի, 135.1 մլն դրամ՝ Աբու-Դաբիի Զարգացման Հիմնադրամի, 669.2 մլն դրամ՝ Գերմանիայի Դաշնային Հանրապետության, 8.5 մլրդ դրամ՝ ՌԴ, 31 մլն դրամ՝ Ֆրանսիայի նկատմամբ պարտավորությունների մարմանը:

Հաշվետու ժամանակահատվածում -21.4 մլրդ դրամ են կազմել ֆինանսական զուտ ակտիվները՝ ապահովելով կիսամյակային ծրագրի 99.4% կատարողական, որից 19.6 մլրդ դրամը հատկացվել է ԼՂՀ-ին՝ որպես միջպետական վարկ: Վրաստանի կողմից միջպետական վարկի գծով վճարվել է 172.6 մլն դրամ՝ կազմելով կիսամյակային ծրագրի 100%-ը: Բաժնետոմսերի և կապիտալում այլ մասնակցության ձեռքբերմանն ուղղվել է 1.0 մլրդ դրամ՝ կազմելով կիսամյակային ծրագրի 74.9%-ը: Հաշվետու ժամանակահատվածում 916.7 մլն դրամով ավելացել է արտաքին աղբյուրներից ստացված արտաբյուջետային դրամաշնորհային միջոցների մնացորդը: